

Ang Pagtukod sa Pangasaw-onon

Basahong Kasulatan: Gen. 1:26; 2:7-10, 18-25; Bug. 19:7-9; 21:9-11

I. Ang pagtukod sa Dios mao ang sentrong butang sa tibuok Biblia; ang pangasaw-onon ni Cristo mao ang pagtukod sa Tulo-usang Dios—“Ang gusok nga gikuha ni Jehova nga Dios gikan sa tawo gitukod Niya nga babaye ug gidala siya ngadto sa lalaki”—Gen. 2:22:

- A. Ikatandi ang tibuok Biblia sa gamayng basahon isip giya sa pagtukod; ang gipadayag bahin sa tanaman sa Eden, nga sinugdan sa diosnong pinadayag sa Balaang Kasulatan, ug ang gipadayag bahin sa Bag-ong Jerusalem, nga kataposan sa diosnong pinadayag sa Balaang Kasulatan, nagpasumbalikay sa usag usa.
- B. Ang gipadayag ning duha ka bahin sa Kasulatan mao ang sentrong hunahuna sa Dios, ang sentrong linya sa diosnong pinadayag, ug mao ang prinsipyong modumala sa paghubad ug pagsabot sa Balaang Kasulatan:
 - 1. Ang Genesis 1 ug 2 maoy disenyo sa organicong arkitektura nga plano sa Dios aron mabatonan ang Iyang diosnong pagtukod (Heb. 11:10); tinguha sa Dios nga tukoron si Cristo nganha sa tiunay natong pagkamao aron maumolan pag-usab og Cristo ang tibuok natong pagkatawo; sa ingon niini makabaton ang Dios og hiniusang tawo nga magpadayag Niya sa Iyang dagway ug morepresentar Niya gamit ang Iyang pagbulot-an (Gen. 1:26; 1 Cor. 3:9; Mat. 16:18; 2 Sam. 7:12-14a).
 - 2. Ang Bugna 21 ug 22 mao ang letrato sa nahuman na nga balay, ang hiniusang pagpadayag sa Tulo-usang Dios; ang Bag-ong Jerusalem mao ang nagpasumbalik ug katumanan sa diosnong pinadayag bahin sa tanaman sa Eden.
 - 3. Mobalik si Cristo isip Pamanhonon aron minyoan ang Iyang pangasaw-onon, nga mao unya ang kinatibuk-an sa mga mananaog; kining pagtukod sa mga mananaog karong panahona mao ang unang pagkahingpit sa Bag-ong Jerusalem sa panahon sa gingharian (19:7-9) ug sa kapulihay mao ang kinasang-ang pagkahingpit sa Bag-ong Jerusalem sa bag-ong langit ug bag-ong yuta (21:2).
 - 4. Sa mapadayonong pagbuhat sa Espiritu Santo sa tanang nilabayng siglo, makab-ot kining tumonga sa kataposan ning panahona; unya maandam na ang pangasaw-onon, ang madaogong mga magtutuo, ug moabot ang gingharian sa Dios—Mat. 26:29; 13:43.
 - 5. Tumanon sa hiniusang pangasaw-onon, sa Bag-ong Jerusalem, ang duha ka aspeto sa tuyo sa Dios (Gen. 1:26); una, ang Bag-ong Jerusalem mao unya ang hingpit nga pagpadayag sa Dios sa tibuok dagway Niya aron mahimaya Siya, (Bug. 21:11; itandi sa 4:3); ikaduha, kining Bag-ong Jerusalem ang mobuntog sa kaaway, mosakop sa yuta, ug mogamit sa pagbulot-an sa Dios ug modumala sa tibuok uniberso (Gen. 1:26, Bug. 22:5; itandi sa 20:10, 14-15).
- C. Sa makighigugmaay ta nga katawhan sa Dios Kaniya, madawat nato ang Iyang kinabuhi, maingon nga nadawat ni Eva ang kinabuhi ni Adam; kining kinabuhia ang magpausa nato sa Dios ug magpausa Niya kanato—Gen. 2:21-22.

II. Aron mausa ang Dios ug ang Iyang katawhan, maghigugmaay gyod sila; ang paghigugmaay sa Dios ug sa Iyang katawhan nga gipadayag sa Biblia

labi gyong sama sa mabinationg paghigugmaay sa lalaki ug babaye—Juan 14:21, 23; Jer. 2:2; 31:3:

- A. Sa mahigugma ang katawhan sa Dios Kaniya ug mogugol og panahon nga makig-ambitay Niya diha sa Iyang pulong, tuhopan sila sa Dios sa Iyang diosnong elemento, nga magpausa nila Kaniya isip kapikas Niya, nga sama Niya sa kinabuhi, kinaiya, ug pagpadayag—Sal. 119:140, 15-16.
- B. Unang nahigugma ang Dios kanato kay gipatuhopan man ta Niya sa Iyang gugma ug gipahimugso sa sulod nato ang gugmang gihigugma nato Niya ug sa mga igsoon—1 Juan 4:19-21.
- C. Ang kinabuhing nadawat nato gikan sa Dios kinabuhi man sa gugma; nagkinabuhi si Cristo ning kalibotana sa kinabuhi sa Dios ingon nga gugma, ug Siya maoy kinabuhi nato karon aron magkinabuhi ta sa samang kinabuhi sa gugma ning kalibotana ug masama Niya—3:14; 5:1; 2:5-6; 4:17.
- D. Ilansang gyod sa krus ang natural natong gugma; ang usa ka kalainan sa gugma sa Dios ug sa natural nga gugma nato mao nga dali kaayong masilo ang natural natong gugma.
- E. Mga tawo gyod unta tang nabahaan ug naanod sa gugma ni Cristo; masama gyod unta ang diosnong gugma sa bul-og sa dagkong tubig nganhi nato, nagpugos nato nga mabuhi ngadto Niya labaw sa atong kaugalingong pagpugong—2 Cor. 5:14.
- F. Daan ug bag-o ang sugo kalabot sa gugmang inigsoon: daan, kay naa na man kini sa mga magtutuo sukad pa sa sinugdan sa ilang Cristohanong kinabuhi; bag-o, kay sa ilang Cristohanong paggawi balikbalik man kining mobanagbanag nga dunay bag-ong kahayag ug mosidlak nga dunay bag-ong paghayag ug bag-ong kusog—1 Juan 2:7-8; 3:11, 23; itandi sa Juan 13:34.
- G. Matukod ang Lawas sa iyang kaugalingon diha sa gugma aron mahimong pangasaw-onon ni Cristo (Efe. 4:16); ang hinatag-sa-Dios, gipanganak pag-usab nga espiritu nato espiritu man sa gugma; nagkinahanglan ta sa nagdilaab nga espiritu sa gugma nga mobuntog sa pagkadaot sa iglesia karon (2 Tim. 1:7).
- H. “Makapaburot ang kahibalo, apan makatukod ang gugma” (1 Cor. 8:1b; itandi sa 2 Cor. 3:6); ilhanan ang paghigugmaay sa usag usa nga iya ta ni Cristo (Juan 13:34-35); kanang ganahang manguna sa iglesia batok man sa mahigugma sa tanang igsoon (3 Juan 9).
- I. Maingon nga gitugyan ni Ginoong Jesus ang Iyang kinabuhi-sa-kalag aron mabatonan nato ang diosnong kinabuhi, wad-on gyod nato ang atong kinabuhis-sa-kalag ug dumilian ang kaugalingon aron mahigugma sa mga igsoon ug mangalagad og kinabuhi ngadto nila diha sa pagbatasan sa kinabuhi sa Lawas aron maandam ang pangasaw-onon ni Cristo—1 Juan 3:16; 4:17 ug nota 5; Juan 10:11, 17-18; 15:13; Efe. 4:29—5:2; 2 Cor. 12:15; Rom. 12:9-13.
- J. Ang gugma maoy labing maayong paagi nga mahimo tang bisan unsa ug makabuhat og bisan unsa aron matukod ang iglesia nga organicong Lawas ni Cristo—1 Cor. 12:31b—13:8a.

III. Makita gyod unta nato ang gibuhat sa Dios aron magpalugwag kapikas alang sa Iyang Kaugalingon; gipadayag sa Genesis 2 ang hulagway ni Cristo ug sa Iyang pangasaw-onon nga gihulagwayan ni Adam ug Eva:

- A. Naghulagway si Adam sa Dios diha ni Cristo isip tinuod, unibersohanong Bana, nga nagtinguhag asawa alang sa Iyang Kaugalingon—Rom. 5:14; itandi sa Juan 3:29; 2 Cor. 11:2; Efe. 5:31-32; Bug. 19:7-9; 21:9-11.

- B. “Niingon si Jehova nga Dios, Dili maayo nga mag-inusara ang tawo; buhatan Ko siyag katabang ingon nga kapikas niya”—Gen. 2:18:
1. Ang panginahanglan ni Adam og asawa nagtimaan ug naghulagway man sa panginahanglan sa Dios, diha sa Iyang pamatigayon, nga makabaton og asawa ingon nga kapikas Niya, ighingpit Niya (sa linetra, kaabay Niya); bisag hingpit gyod ang Dios, ug si Cristo sa walay kataposan, dili Siya kompleto kon wala ang iglesia nga Iyang asawa.
 2. Nagtinguha ang Dios nga makabaton ni Adam, nga naghulagway ni Cristo, ug ni Eva, nga naghulagway sa iglesia; tuyo Niya nga “pabut-on sila” (1:26); pagpakabaton kinig madaogong Cristo ug madaogong iglesia, si Cristo nga nakadaog sa buhat sa yawa ug ang iglesiang nagpukan sa buhat sa yawa; gusto sa Dios nga pabut-on si Cristo ug ang iglesia (Rom. 5:17; 16:20; Efe. 1:22-23).
- C. Giporma sa Dios gikan sa yuta ang tanang mananap sa kapatagan ug tanang langgam sa langit ug gidala kini kang Adam, “ug ginganlan sa tawo ang tanang hayop ug ang mga langgam sa langit ug ang tanang mananap sa kapatagan, apan walay nakit-an nga katabang alang ni Adam ingon nga kapikas niya”—Gen. 2:19-20.
- D. Sama gyod ang asawa sa bana sa kinabuhi, kinaiya ug pagpadayag; diha sa kahayopan, mga langgam, ug mga mananap wala makakita si Adam og ikahingpit niya, kanang ikaparis niya—v. 23.
- E. Aron makapalugwag ighingpit Niya, nahimo unang tawo ang Dios, nga gihulagwayan sa paglalang sa Dios kang Adam—Juan 1:14; Rom. 5:14.
- F. “Gipahinanok ni Jehova nga Dios ang tawo, ug natulog siya; ug gikuha Niya ang usa sa iyang mga gusok ug gitakpan Niya ang unod sa dapit niini”—Gen. 2:21:
1. Ang pagkahinanok ni Adam aron mapalugwa si Eva nga asawa niya naghulagway sa pagkamatay ni Cristo sa krus aron mapalugwa ang iglesia nga kapikas Niya—Efe. 5:25-27.
 2. Sa Biblia, nagpasabot sa kamatayon ang pagkatulog—1 Cor. 15:18; 1 Tes. 4:13-16; Juan 11:11-14.
 3. Ang kamatayon ni Cristo mao ang kamatayon nga nagpagula-og-kinabuhi, nagpaambit-og-kinabuhi, nagpasanay-sa-kinabuhi, nagpadaghan-sa-kinabuhi, ug nanganak-og-kinabuhi, nga nagtimaan sa lugas sa trigo nga nahulog sa yuta aron mamatay ug motubo para mamungag daghang trigo (12:24) aron himoong tinapay nga mao ang Lawas, ang iglesia (1 Cor. 10:17).
 4. Tungod sa pagkamatay ni Cristo nakagula ang diosnong kinabuhi sa sulod Niya, ug tungod sa pagkabanhaw Niya gikapaambit ang nakagulang diosnong kinabuhi Niya nganha sa Iyang mga magtutuo aron maumol ang iglesia—Luc. 12:49-50; itandi sa Rom. 12:11; Bug. 4:5.
 5. Pinaagi nianang kahikayana giumol ang Dios diha ni Cristo nganha sa tawo lakip na ang Iyang kinabuhi ug kinaiya aron masama sa Dios ang tawo sa kinabuhi ug kinaiya para mahiangay Niya isip kapikas Niya.
- G. “Ug ang gusok nga gikuha ni Jehova nga Dios gikan sa tawo gitukod Niya nga babaye ug gidala siya ngadto sa lalaki”—Gen. 2:22:
1. Ang gusok nga gikuha gikan sa naabliing kilid ni Adam naghulagway sa dili mabali, dili madaot nga kinabuhing dayon ni Cristo (Heb. 7:16; Juan 19:32-33, 36; Exo. 12:46; Sal. 34:20), nga niagay sa gidughang nga kilid Niya (Juan 19:34) aron magpaambit og kinabuhi sa mga magtutuo Niya para mapalugwa ug matukod ang iglesia nga ighingpit Niya:

- a. Gikan sa kilid ni Cristo nigula ang dugo ug tubig, apan ang tanang nigula gikan sa kilid ni Adam mao ang gusok nga walay dugo.
 - b. Tungod kini kay sa panahon ni Adam wala kinahanglana ang pagtubos pinaagi sa dugo, kay wala may sala; sa panahon nga “natulog” si Cristo didto sa krus, naa ang problema sa sala; busa, ang dugo nga nigula gikan sa kilid ni Cristo alang man sa balaodnong pagtubos kanato.
 - c. Human sa dugo, nigula ang tubig, nga mao ang nag-agay nga kinabuhi sa Dios aron organico tang maluwas (Exo. 17:6; 1 Cor. 10:4; Num. 20:8); gihulagwayan kining diosnon, nag-agay, ug dili linalang nga kinabuhi sa gusok nga gikuha sa kilid ni Adam (Rom. 5:10).
2. Wala moingon ang Genesis 2:22 nga gilalang si Eva kondili gitukod siya; ang pagtukod ni Eva ginamit ang gusok nga gikuha sa kilid ni Adam naghulagway sa pagtukod sa iglesia pinaagi sa kinabuhi sa pagkabanhaw nga nigula gikan ni Cristo sa pagkamatay Niya didto sa krus ug gipaambit ngadto sa Iyang mga magtutuo sa pagkabanhaw Niya—Juan 12:24; 1 Ped. 1:3.
 3. Ang iglesia isip tinuod nga Eva maoy kinatibuk-an ni Cristo diha sa tanang magtutuo Niya; ang iglesia mao ang hulad ni Cristo; gawas sa elemento ni Cristo, wala gyoy laing elemento diha sa iglesia—Gen. 5:2.
- H. Ang naggikan ra ni Cristo nga dunay kinabuhi sa pagkabanhaw Niya ang mahimong ighingpit Niya isip pangasaw-onon Niya (1 Cor. 12:12; Efe. 2:6; 5:28-30); lubos gyong lugwa ni Cristo ang iglesia; “Cristohon,” “mabanhawon,” ug langitnon ang iglesia.
 - I. Kay usa man si Adam ug Eva, nagkinabuhi sila sa kaminyoon isip bana ug asawa (Gen. 2:24-25); nagpakita kini nga sa Bag-ong Jerusalem ang nahikay ug nahingpit nga Tulo-usang Dios isip unibersohanong Bana magkinabuhi sa kaminyoon uban sa tinubos, gipanganak pag-usab, natransporma, ug nahimayang katawhan isip asawa, hangtod sa hangtod (Bug. 22:17a).
 - J. Sa eternidad nga walay kataposan, magkinabuhi sila nga panagsagol sa Dios ug sa tawo isip usa ka espiritu, sa kinabuhing maayo kaayo ug nag-awas sa kabulahan ug kalipay, pinaagi sa diosnon, walay kataposan, ug labaw-sa-tanan nga mahimayaong kinabuhi.